

四庫全書

集部

欽定四庫全書

唐詩紀事卷七十

宋 計敏夫 撰

許棠

張喬

劇燕

任濤

張蠟

鄭谷

溫憲

李昌符

王轂

李山甫

伊璠

鍾離權

許棠

分與仙山背多年負翠微無因隨鹿去只是送人歸頂
木晴摩日根嵐曉潤衣會於猿鳥外相對掩高扉棠旅

中送人歸九華詩也大抵棠詩多穩葉如曉嶂猿窺戶
寒秋鹿砥冰當空吟待月到晚坐看山類恬淡絕物者
然非真好也棠字文化宣州涇縣人登咸通十二年進
士第有洞庭詩為工時號許洞庭初為涇縣尉鄭谷以
詩送云白頭新作尉縣在故山中高第能卑宦前賢尚
此風蕪湖春蕩漾梅雨晝溟濛佐理人安後篇章莫廢
功

棠洞庭詩有四顧疑無地中流忽有山之句人以題扇

過洞庭云驚波常不定半日鬢堪班四顧疑無地中流
忽有山鳥飛應畏墮帆遠却如閑漁父時相引行歌浩渺間

張喬

喬池州人有詩名咸通中與許棠俞坦之劇燕任濤吳罕張蠻周繇鄭谷李栖遠溫憲李昌符謂之十哲十哲而十人

咸通中京兆府解試月中桂詩喬擅場云與月轉洪濛

扶疎萬古同根非
生下土葉不墜秋風每以圓時足還
隨缺處空影高羣木外香滿一輪中未種丹霄日應虛
白兔宮如何當羽化細得問神功其年李建州頗主試

時為京兆府參軍以許棠老於場屋以為首薦未幾巢冠為亂

遂與伍喬之徒隱九華

喬送許棠云離鄉積歲年歸路遠依然夜火山頭市春
江樹杪船干戈愁鬢改瘴癘喜家全何處營甘旨潮濤
浸薄田

喬與俞坦之受知許下薛尚書能許棠首薦能以詩唁
二子曰何事盡參差惜哉吾子詩日令銷此道天亦負
明時有路當重振無門即不知何當見堯日相與啜澆
漓

喬遊終南白鶴觀詩云上徹鍊丹峯求玄意未窮古壇
青草合往事白雲空仙境日月外帝鄉煙霧中人間足
煩暑欲去戀清風

送友人歸宜春云落花兼柳絮無處不紛紛遠道空歸

去流鶯獨自聞野橋喧
磧水山郭入樓雲故里南陔曲
秋期更送君

鄭谷題喬廷興門外所居云平生苦節同
旦夕會原東掩卷斜陽裏看山落木中星霜人欲老
江海業全空近日文場裏因君起古風

劇燕

劇燕蒲阪人也工為雅正詩王重榮鎮河中燕投贈王
曰祇向國門安四海不離鄉井拜三公重榮甚禮重為

人多縱凌轢諸從事竟為正平之禍

任濤

任濤豫章筠川人也詩名早著有露園沙鶴起人卧釣
船流他皆倣此數舉敗於垂成李常侍騭廉察江西特
與放鄉里之役盲俗互有論列騭判曰江西境內凡為
詩得及濤者即與放色役不止一任濤耳

李建州頻主京兆解試時濤與許棠張喬俞坦之劇燕
吳罕張蠻周繇鄭谷李栖遠溫憲李昌符謂之十哲是

年試俱以次得之是歲咸通末也月中桂詩張喬擅場
頻以許棠場屋多年為首薦

張贊

詠葦詩云葦叢寒水邊曾折釣漁舟咸喜亭臺近翻嫌
島嶼偏花明無月夜聲急正秋天遙憶巴陵渡殘陽一
望煙送友人赴涇川幕云杏園沉飲散榮別就佳招日
月相期盡山川獨去遙府樓明蜀雪闔磧轉胡鶻縱有
煙塵動應隨上策銷

蠻字象文唐末登第尉櫟陽避亂入蜀王蜀時為金堂
令徐后遊大慈寺見壁間題云牆頭細雨垂纖草水面
回風聚落花問寺僧僧以蠻對乃賜霞光牋令寫詩以
進蠻進二百首衍善之名為知制誥宋光嗣以蠻輕忽
傲物遂止卒於官蠻生穎秀幼有單于臺詩曰白日地
中出黃河天外來為世所稱

鄭谷

殘月如新月云榮落何相似初終却一般猶疑和夕照

誰信墜朝寒水國光華別詩情比象難佳人應誤拜棲
鳥返求安屈指期輪滿何心誚影殘庾樓清賞處吟徹
曙鐘看谷自序云幼受知於李公朋馬博士戴求試春
闈故辭許昌能李建州頻不以晚輩見待遊舉場十六
年著述千餘首乾寧初上幸三峯朝謁多暇寓止雲臺
道舍遂拾墜補遺成三百首目為雲臺編

谷字守愚袁州人故永州刺史之子幼年司空圖與刺
史同院見而奇之曰曾吟得丈丈詩否曰吟得莫有病

否曰丈丈曲江晚望斷篇云村南斜日閑廻首一對鴛
鴦浴渡頭即深意矣司空嘆惜撫背曰當為一代風騷
主乾寧中為都官郎中卒于家谷自叙云故許昌薛尚
書能為都官郎中後數年建州李員外頻自憲府內彈
拜都官員外皆一時騷雅宗師都官之曹振盛於此余
早受知今忝此官復是正秩何以相繼前賢耶

谷詠雪詩云亂飄僧舍茶煙濕密洒歌樓酒力微江上
晚來堪畫處漁翁披得一蓑歸有段贊善者善畫因採

其詩意寫之成圖曲盡瀟洒之意持以贈谷谷為詩寄
謝云贊善賢相後家藏名畫多留心於素繪得意在煙
波屬興同吟詠功成更琢磨愛余風雪句幽絕寫漁蓑
濃澹方春滿蜀鄉半隨風雨斷鶯腸浣花溪上堪惆悵
子美無情為發揚谷蜀中海棠詩也

相者臨遠水獨自上孤舟句潮來無別浦木落見他山
句情多最恨花無語愁破方知酒有權句關東多事日
天末未歸心句掩卷斜陽裏看山落木中句兩浙尋山

偏孤舟帶鶴歸句長安一夜殘春雨右省三年老拾遺
句班趨黃道急殿揖紫宸深句已上皆谷詩警策

題杭州樟亭云故國江天外登臨返照間潮來無別浦
木落見他山沙鳥晴飛遠漁人夜唱閑歲窮歸未得心
逐片帆還

感興云禾黍不陽艷競裁桃李春翻令力耕者半作賣
花人

曲江春草云花落江堤簇晚煙雨餘江色遠相連香輪

莫輞青青破留與愁人一醉眠

十日菊云節去風愁蝶不知曉庭還繞折殘枝自緣今

日人心別未必秋香一夜衰

石城云石城昔為莫愁鄉
莫愁魂散石城荒江人依舊
棹舴艋江岸還飛雙鴛鴦帆去
帆來風浩渺花開花謝
春悲涼煙濃草遠望不盡千古漢陽閑
夕陽卷末偶題
云一卷疎蕪一百篇成未敢便忘筌
何如海日生殘夜一句能令萬古傳

谷不喜高仲武間氣集而喜殷璠河岳英靈集嘗有詩

云殷璠鑒裁英靈集頗覺同才得旨深何事後來高仲
武品題間氣未公心

仲武璠二集皆品題唐人詩

溫憲

溫憲貞外廷筠子也僖昭之間就試於有司值鄭相延
昌掌邦貢也以其父文多刺時復傲毀朝士抑而不錄
既不第遂題一絕於崇慶寺壁後榮陽公登大用因國
忌行香見之憫然動容暮歸宅已除趙崇知舉即召之

謂曰某頃主文衡以溫憲廷筠之子深怒嫉之今日見一絕令人惻然幸勿遺也於是成名詩曰十口溝隍待一身半年千里絕音塵鬢毛如雪心如死猶作長安下第人

杏花詩云團雪正晴梢江明映碧寥店香風起夜村白雨休朝靜落頻沾帶繁開正蔽條澹然閑賞玩無以破妖韶

憲光啓中為山南從事李巨川草薦表盛述先人之屈

曰娥眉先妬明妃為去國之人猿臂自傷李廣乃不侯
之將溫終於山南從事

李昌符

送琴客詩云楚客抱離思蜀琴留恨聲坐來看月落聽
久覺秋生夜靜騷人語天高別鶴鳴因君興一歎竟夕
亦難平

秋晚歸故居云馬省曾行處連嘶渡晚河忽驚鄉樹出
漸識路人多細徑穿木黍頽垣壓薜蘿乍歸猶似客隣

叟亦相遇

傷春云酒醒鄉闊遠迢迢聽漏終曙分林影外春盡雨
聲中鳥思江村路花殘野岸風十年成底事羸馬倦西
東

鄭谷寄膳部李郎中昌符詩云鄂郊陪野步早歲偶因
詩自後吟新句長愁減舊知靜燈微落燼寒硯旋生澌
夜夜冥搜苦那能鬢不衰

昌符字嵩夢登咸通四年進士第歷尚書郎

塞上行云漭滻蘆關北孤城帳幕多客軍甘入陣老將
望廻戈樹盡禽棲草氷堅路在河汾陽尋下世羌虜肯
先和

北夢瑣言云咸通中前進士李昌符有詩名久不登第
常歲卷軸怠於裝修因出一奇乃作婢僕詩五十首於
公卿間行之其間有詩云春娘愛上酒家樓不怕歸遲
總不憂推道那家娘子卧且留教住待梳頭又云不論
秋菊與春花箇箇能噇空肚茶無事莫教頻入庫一名

閑物要此此諸篇皆中婢僕之諱浹旬京城盛傳是年登第與夫桃杖虛靴事雖不同用奇即無異也

王轂

暑日題道傍樹云火輪迸焰燒長空浮埃撲面愁濛濛
羸童走馬喘不進忽逢碧樹含清風清風留我移時住
滿地濃陰懶前去却歎人無及物功不似團團道傍樹
鴻門讐云寰海沸兮爭戰苦風雲愁兮會龍虎四百年
漢欲開基項莊一劖何虛舞殊不知人心去暴秦天意

歸明主項王足底踏漢土席上相看渾未悟

轂字虛中宜春人登乾寧進士第有玉樹曲云陳宮內宴明朝日玉樹新粧逞嬌逸三閣霞明天上開靈鼉振搗神仙出天花數朵風吹綻對舞輕盈瑞香散金管紅絃旖旎隨霓旌玉佩參差轉璧月夜滿樓風輕蓮舌冷冷詞調新當行狎客盡居祿真諫犯顏無一人歌舞未終樂未闋晉王劒上粘腥血君臣猶在醉鄉中一面已無陳日月聖唐御宇三百祀漢上桑間宜禁止請停此

曲歸正聲願將雅樂調元氣

轂未及第時輕忽被人毆擊揚聲曰莫無禮吾便是君
臣猶在醉鄉中一面已無陳日月毆者歛衽慙謝而退
轂唐末為尚書郎中致仕

轂始與崔胤同在庠序相善將赴舉胤餞之有日者在
坐曰待此郎為相乃登第二十年胤為相轂遂登第

李山甫

咸通中數舉進士被黜依魏博樂彥禎幕府內樂禍且

忽中朝大臣導彥禎子從訓伏兵殺王鐸劫其家嘗有
詩云勸君莫用誇頭角夢裏輸贏總未真譏執政也巢
寇之亂翰林待詔王遨者北遊在鄴山甫遇於道觀謂
曰幽蘭綠水可得聞乎遨應命奏之曲終潛然曰憶在
咸通玉亭秋夜供奉至尊不意流離至此也山甫賦詩
曰幽蘭綠水耿清音歎惜先生枉用心世上幾時曾好
古人前何必獨嚮襟句未成山甫亦自黯然悲其不遇
也

貧女云平生不織綺羅裳閑把荆簪益自傷鏡裏祇應
諳素貌人間多是重紅粧當年未嫁還憂老終日求媒
即道狂兩意定知無處說暗垂珠淚滴蚕筐

贈處士琴云情知此事少知音自是先生枉用心世上
幾時曾好古人間何必更沾襟致身不以笙簧巧悅耳
寧知鄭衛淫三尺絃桐七條線子期師曠兩沉沉

國初高英秀者與贊寧為詩友辯捷滑稽嘗譏古人詩
病云山甫覽漢史王莽弄來曾半破曹公將去便平沉

是破船詩李羣玉詠鷓鴣方穿詰曲崎嶇路又聽釣輶
格磔聲是梵語詩羅隱曰雲中鷄犬劉安過月裏笙歌
煬帝歸是見鬼詩杜荀鶴今日偶題題似着不知題後
更誰題此衛子詩也不然安有四蹄

伊璠

璠及第後寄梁燭處士云繡轂尋芳許史家獨將羈思
達江沙十年辛苦一枝桂二月艷陽千樹花鵬化四溟
歸碧落鶴棲三島接青霞同袍不得同遊翫今對春風

日又斜

璠登咸通四年進士第曾為涇陽令至黃巢亂璠陷寇屢脫命於刃下其後逃避與其家相失夜至藍關猛獸搏而食之

鍾離權

邢州開元寺有唐鍾離權處士二詩其一云得道高僧不易逢幾時歸去願相從自言住處連滄海別是蓬萊第一峯其一云莫厭追歡笑語頻尋思離亂好傷神閑

來屈指從頭數得見清平有幾人

唐詩紀事卷七十

欽定四庫全書

唐詩紀事卷七十一

宋 計敏夫 撰

張道古

許鼎

李京

胡曾

伍唐珪

韓定辭

蔣貽恭

狄歸昌

李拯

高越

許桺

孫蜀

牛嶠

崔庸

同谷子

陳詠

李旭

沈彬

周朴

孫鯤

王易簡

范攢之子

鄭雲叟

謝太虛

李嶼 江為

張道古

昭宗時拾遺張道古貢五危二亂表黜居于蜀後聞駕走西岐又遷東洛皆契五危之事悉歸二亂之源因吟一章上蜀王詩曰封章纔達冕旒前默詔俄離玉座端二亂豈由明主用五危終被佞臣彈西巡鳳府非為固東播鑾輿卒未安諫疏至今如可在誰能更與讀來者道古臨淄人景福中進士釋褐為著作郎遷右拾遺播

遷之後方鎮阻兵道古上危亂疏云只今劉備孫權已
生於世矣責施州司戶參軍後入蜀王氏聞而憾之乃
變姓名賣卜導江青城市中建開國名為武部郎中至
玉壘關謂所親曰吾唐室諫臣終不能拳跼與鷄犬同
食雖名必再貶於此之日葬我於關東不毛之地題曰
唐佐輔補闕張道古墓後遇害妻亦繼亡蜀主憫之俾
祔葬焉鄭雲叟在華聞之有詩哭之曰曾陳章疏忤昭
皇撲落西南事可傷豈使諫臣終屈辱直疑天道惡忠

良生前賣卜居三蜀死後馳名遍大唐誰是後來修史者言君力死正頽綱

乾符中道古在王鎔幕府一日久旱得雨衆賓賦詩道古最後曰亢陽今已久嘉雨自雲傾一點不斜去極多時下成禪月以詩悼之曰清河逝水太忽忽東觀無人失至公天上君恩三載隔鑑中鸞影一時空墳生苦霧蒼茫外門掩寒雲寂寞中惆悵斯人又如此一聲蠻笛

滿江風

許鼎

登嶺望詩云森森三江水悠悠五嶺關鴈飛猶不渡人
去若為還

鼎唐末詩人至梁貞明六年始登第

李京

除夜長安作云長安朔風起窮巷掩雙扉新歲明朝是
故鄉何路歸鬢絲饒鏡色隙雪奪燈輝却羨秦州鴈逢
春盡北飛

京唐宋詩人至梁貞明六年登第

胡曾

寒食都門詩云二年寒食住京華
寓目春風萬萬家
金絡馬銜原上草
玉釵人折路傍花軒
車競出紅塵合
冠蓋爭廻白
日斜誰念都門雨
行淚故園寥落在長沙
高駢鎮蜀南蠻時
飛一木夾有借錦江飲馬之語
曾時為書記以檄破之
兼有詩云辭天出塞陳雲空霧卷霞
開萬里通親受虎符安宇宙誓將龍劖定英雄殘霜散

冒高懸日秋葉爭禁大段風為報南蠻須屏跡不同蜀

將武侯公

或曰路當鎮
蜀日曾為之

王衍五年宴飲無度衍自唱韓琮柳枝詞曰梁苑隋堤事已空萬條猶舞舊春風何如思想千年事誰見楊花入漢宮內侍宋光溥詠曾詩曰吳王恃霸棄雄才貪向姑蘇醉綠醅不覺錢塘江上月一宵西送越兵來衍怒罷宴曾有詠史詩百篇行于世

伍唐珪

寒食日獻郡守云入門堪笑復堪憐三逕苔荒一釣船
慙愧四隣教斷火不知厨裏久無煙

唐珪唐末進士也

韓定辭

定辭為鎮州王鎔書記聘燕帥劉仁恭舍於賓館命幕
客馬或延接馬有詩贈韓云燧林芳草綿綿思盡日相
攜陟麗譙別後嶧崿山上望羨君時復見王喬或詩清
秀然意在試其學問韓於座酬之曰崇霞臺上神仙客

學辨凝龍藝最多盛德好將銀管述麗詞堪與雪兒歌
座賓靡不欽訝然亦疑銀管之僻也他日或持燕帥之
命答聘常山亦命定辭接於公館或從容問韓以雪兒
銀管之事韓曰昔梁元帝為湘東王時好學著書常紀
忠臣義士及文章之美者筆有三品或以金銀雕飾或
用斑竹為管忠孝全者用金管書之德行清粹者用銀
管書之文章贍麗者以斑竹書之故湘東之譽振於江
表雪兒者李密之愛姬能歌舞每見賓寮文章有奇麗

入意者即付雪兒叶音律以歌之又問癡龍出自何處定辭曰洛下有洞穴曾有人誤墮於穴中因行數里漸見明曠見有宮殿人物凡九處又見有大羊羊鬚有珠人取而食之不知何所後出以問張華華曰此地仙九館也大羊者名曰癡龍耳定辭復問或燿崧山當在何處或曰此隋郡之故事何謙光而下問由是兩相悅服結交而去

蔣胎恭

貽恭詠蠶詩云辛勤得繭不盈筐燈下縫絲恨更長看處不知來處苦但貪衣上繡鴛鴦

貽恭江淮人唐末入蜀巧於刺譏蜀人畏之孟氏時卒官止令佐而已

狄歸昌

僖宗幸蜀或題馬嵬驛云馬嵬煙柳正依依重見鑾輿幸蜀歸泉下阿蠻應有語這回休更怨楊妃或云歸昌詩也時為侍郎或謂羅隱詩

李拯

襄王僭偽朱政秉政百揆失序逼李拯為內署拯嘗吟曰紫宸朝罷綴鴛鸞丹鳳樓前駐馬看惟有終南山色在晴明依舊滿長安拯終為亂兵所殺

拯字昌時隴西人登咸通十二年進士第僖宗幸寶雞拯在鳳翔襄王逼為翰林學士及王行瑜殺政襄王奔京城拯及妻盧皆被害

高越

越燕人舉進士文價藹然鄂帥李簡賢之待以殊禮將
妻以女越竊諭其意賦詩一絕書于壁不告而去詩云
雪爪星眸衆所歸摩天專待振毛衣虞人莫謾張羅網
未肯平原淺草飛

出唐餘錄

許郴

中秋夜有懷云趨馳早晚休一歲又殘秋若只如今日
何難致白頭滄波歸處遠旅食客邊愁賴見前賢說窮
通不自由

郴睦州人鄭谷送郴罷舉歸睦州詩云桐廬歸舊廬垂老復樵漁吾子雖言命鄉人懶讀書

孫蜀

中秋夜戲酬顧道流云不那此身偏愛月等閑看月即更深仙翁每被嫦娥使一度逢圓一夜吟

蜀與方干同時干有別蜀之作云吳越思君意易傷別君添我鬢邊霜由來淛水偏堪恨截斷千山作兩鄉

牛嶠

紅薔薇云曉啼珠露渾無力繡簇羅襦不着行若緩壽
陽公主額六宮爭肯學梅粧

嶠字松卿一字延峰隴西人自云僧孺之後乾符五年
進士歷遺補尚書郎王建鎮蜀辟判官及僭位為給事
中

崔庸

蘇州崑山惠嚴寺殿基或曰鬼工有僧繇畫龍每風雨
如騰躍狀僧繇畫鎖以釘固之乾寧初吳郡進士崔庸

有詩云人莫嫌山小僧還愛寺靈殿高神氣力龍活客

丹青

庸登天祐二年進士第

同谷子

昭宗播岐何后用事有同谷子者詠五子之歌何后潛
令秦王誅之事未行而奔去詩曰邦唯固本自安寧臨
下常須馭朽驚何事十旬遊不返禍胎從此召殷兵酒
色聲禽號四荒那堪峻宇又彫牆靜思今古為君者未

或因茲不滅亡唯彼陶唐有冀方少年都不解思量如今筭得當時事首為盤遊亂紀綱明明我祖萬邦君典則貽將示子孫惆悵太康荒墮後覆宗絕祀滅其門仇讐萬姓遂無依頰厚何曾解忸怩五子既歌邦已失一場前事悔難追

陳詠

陳詠眉州青神人有詩名善奕慕昭宗劫遷駐蹕陝郊是歲策名歸蜀韋莊以詩賀之鄉中有嫉善者屬和韋

詩曰讓德已令多士伏沽名還得世人聞譏其比滌器
當爐也陳嘗以詩自負其詩卷有一聯云隔岸水牛浮
鼻渡傍溪沙鳥點頭行杜光庭謂曰先輩佳句甚多何
必以此為卷首詠曰曾為朝廷見賞所以列為卷首時
人笑之

李旭

旭及第後呈朝中知已云凌晨曉鼓奏嘉音雷擁龍迎
出陸沉金榜高懸當玉闕錦衣即着到家林真珠每被

塵泥陷病鶴多遭蠻蟻侵今日始知天有意還教雪得
一生心

旭天祐元年進士登第

沈彬

彬字子文高安人也天才狂逸好神仙之事少孤西遊
以三舉為約常夢着錦衣貼月而飛識者言雖有虛名
不入月矣洪州解至長安初舉納省卷夢仙謠云玉殿
大開從客入金桃爛熟沒人偷鳳驚寶扇頻翻翅龍悞

金鞭忽轉頭第二舉憶仙謠云白榆風颺九天秋王母
朝廻宴玉樓日月漸長雙鳳睡桑田欲變六鼈愁雲翻
簫管相隨去星觸旌幢各自流詩酒近來狂不得騎龍
却憶上清遊第三舉納省卷贈劉象為首云曾應大中
天子舉四朝風月鬢蕭踈不隨世祖重攜劒却為文皇
再讀書十載戰塵銷舊業滿城春雨壞貧居一枝何事
於君惜仙桂年年幸有餘劉象孤寒三十舉無成主司
覽彬詩其年特放象及第彬乾符中值駕起三峯四方

多事南遊嶺表二十餘年回吳中江南僞命吏部郎中致仕

彬唐末遊湖湘隱雲陽山十年餘與虛中齊已貫休以詩名相吹噓又與韋莊杜光庭唱和皆蜀人也疑其曾入蜀

彬詩有九衢冠蓋暗爭路四海干戈多異心之句

周朴

朴唐末詩人寓於閩中於僧寺假丈室以居不飲酒茹

葷塊然獨處諸僧晨粥卯食朴亦攜巾盂廁諸僧下畢
飯而退率以為常郡中豪貴設供率施僧錢朴即巡行
拱手各丐一錢有以三數錢與者朴止受其一了得半
錢以備茶藥之費將盡復然僧徒亦未嘗厭也性喜吟
詩尤尚苦澁每遇景物搜奇抉思日旰忘返苟得一聯
一句則忻然自快嘗野逢一負薪者忽持之且厲聲曰
我得之矣我得之矣樵夫瞿然驚駭掣臂棄薪而走遇
游徼卒疑樵者為偷兒執而訊之朴徐往告卒曰適見

負薪因得句耳卒乃釋之其句云子孫何處閑為客松
栢被人伐作薪彼有一士人以朴僻於詩句欲戲之一
日跨驢於路遇朴在傍士人乃欹帽掩頭吟朴詩云禹
力不到處河聲流向東朴聞之忿遽隨其後且行士但
促驢而去略不回首行數里追及朴告之曰僕詩河聲
流向西何得言流向東士人頷之而已閩中傳以為笑
或曰曉來山鳥鬧雨過杏花稀亦朴詩也古陵寒雨絕
高鳥夕陽明句高情千里外長嘯一聲初句右張為取

作主客圖黃巢至福州求得朴問曰能從我乎答曰我尚不仕天子安能從賊巢怒斬之

孫飭

潤州金山寺張祐孫飭留詩為第一篇山居大江中迥然孤秀詩意難盡羅隱云老僧齋罷關門睡不管波濤四面生孫生句云結宇孤峯上安禪巨浪間又曰萬古波心寺金山名目新天多剩得月地少不生塵過據妨僧定驚濤濺佛身誰言張處士題後更無人飭夜坐句

云劃多灰漸冷坐久席成痕沈彬曰此田舍翁火爐頭
之作爾

鮑南昌人唐末鄭谷避亂歸宜春鮑往依之頗為誘掖
後有能詩聲終於南唐鮑父畫工也王徹為中書舍人
草鮑誥詞云李陵橋上不吟取次之詩顧凱筆頭豈畫
尋常之物鮑終身恨之

王易簡

易簡唐末進士梁乾化中及第名居榜尾不看榜却歸

華山尋就山釋褐授華州幕職後召入拜左拾遺又辭官歸隱留詩一絕曰汨沒朝班愧不才誰能低折向塵埃青山得去且歸去官職有來還自來及再召為郎遷諫垣臺三十年歸華山十年而終

范撝之子

吳人范撝處士之子七歲能詩贈隱者云掃葉隨風便澆花趁日陰方干曰此子他年必成名又吟夏日云閑雲生不雨病葉落非秋干曰惜哉必不享壽果十歲卒

鄭雲叟

鄭徵君為詩皆祛淫靡迥絕置塵如富貴曲云美人梳
洗時滿頭間珠翠豈知兩片雲戴却數鄉稅又詠西施
云素面已云妖更着花鉢飾臉橫一寸波浸破吳王國
又七言傷時帆力劈開滄海浪馬蹄踏破亂山青浮名
浮利過於酒醉得人心死不醒又題霍山秦尊師老鶴
玄猿伴採芝有時長歎獨移時翠娥紅粉嬋娟劍殺盡
世人人不知又偶題似鶴如雲一箇身不憂家國不憂

貧擬將枕上日高睡賣與世間榮貴人又思山詠因賣
丹砂下白雲鹿裘惟惹九衢塵不如將耳入山去萬是
千非愁殺人又景福中作云悶見戈鋌匝四溟恨無奇
策救生靈如何飲酒得長醉直到太平時節醒又招友
人遊春云難把長繩繫日烏芳時偷取醉工夫任堆金
璧摩星斗買得花枝不老無又山居云閑見有人尋移
庵更入深落花流澗水明月照松林醉勸頭陁酒閑教
孺子吟身同雲外鶴斷得世塵侵又詩云冥心栖太室

散髮浸流泉採柏時逢麝香雲忽見山夏狂衝雨戲春
醉戴花眠絕頂登雲望東都一點煙又詩不求朝野知
卧見歲華移採藥歸侵夜聽松飯過時荷竿尋水釣背
局上嵒碁祭廟人來說中原正亂離

雲叟僖宗時應百篇舉不利遂隱華山月到君山酒半
醒朗吟疑有水仙聽無人識我真閑事贏得高秋看洞
庭雲叟宿洞庭詩也

謝太虛

杪秋洞庭懷王道士云漂泊日復日洞庭今更秋青桃
亦何意此夜催人愁惆悵客中月徘徊江上樓心知楚
天遠目送蒼波流謝客久已滅微言無處求空餘白雲
在客興隨孤舟千里杳難盡一身常獨遊故園復何許
江漢徒遲留


李嶼

過洞庭云浩渺注橫流千潭合萬湫半洪侵楚翼一汊
屬吳頭動軸當新霽漫空正仲秋勢翻荆口迄聲擁岳

陽淳遠脉滋衡岳微涼散橘洲星辰連影動嵐翠逐隅
收漸落分行鴈旋添趁伴舟昇騰人莫測安穩路何憂
氣與塵中別言堪象外搜此身如粗了來把一竿休

江為

岳陽樓云傍樓高望極展轉念前途晚葉紅殘楚秋江
碧入吳雲中來鴈急天末去帆孤明月誰同我悠悠上
帝都



唐詩紀事卷七十一

欽定四庫全書

集部

唐詩紀事卷七十五

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣陳際龍

欽定四庫全書

唐詩紀事卷七十二

宋 計敏夫 撰

僧法宣

僧中寤

僧子蘭

僧靈澈

僧靈

僧清江

僧廣宣

僧法宣

和趙郡王觀妓應教詩云桂山留上客蘭室命淫妖城
中畫眉黛宮內束纖腰舞袖風前舉歌聲扇後嬌周郎
不相顧今日管絃調法宣貞觀間人

僧中寤

儀鳳中青城翠圍山下有王僊柯得道蜀州僧中寤以詩贈之云瞻思不及望仙兄早晚昇霞入太清手種一株松未老爐燒九轉藥新成心中已得黃庭術頭上應無白髮生異日却歸華表柱得教凡俗並聞名自是復隱後山更不復遇

僧子蘭

飲馬長城窟詩云游客長城下飲馬長城窟馬嘶聞水

腥爲浸征人骨豈不是流泉終不成潺湲洗盡骨上土
不洗骨中冤骨若比流水四海有還魂空留嗚咽聲聲
中疑是言

秋日思舊山云六言咸言上國繁華豈謂帝城羈旅十點
五點殘螢千聲萬聲秋雨白雲江上故鄉月下風前吟
處欲去不去遲遲未展平生所停

襄陽曲云爲憶南移人移家大堤住千帆萬帆來過盡

門前去

太平里尋兵部裴郎中云不語淒涼無限情荒堦行盡
又重行昔年住此人何在空見槐花秋草生

贈行脚僧云世界曾行遍全無行可修炎涼三衲共生死一身休片斷雲隨體稀踈雪滿頭此門無所着不肯

暫淹留

貪誠云多求待心足未足旋傾覆明知貪者心求榮不求辱

觀棋云拂局盡消時能因長路遲點頭初得計格手待

無疑寂默親遺景凝神入過思共藏多少意不語兩相知

僧靈澈

生於會稽本湯氏字澄源與吳興詩僧皎然遊皎然薦之包佶李紓以是上人之名由二公而颺貞元中遊京師緇流嫉之造飛語激動中貴人浸誣得罪徙汀州後歸會稽元和十一年終於宣州劉夢得曰詩僧多出江右靈一道其源護國襲之清江揚其波法振沿之如么

絃孤韻督入人耳非大音之樂獨吳興畫公能備衆體
澈公承之至如芙蓉園新寺詩曰經來白馬寺僧到赤
烏年謫汀州云青蠅為吊客黃犬寄家書可謂入作者
間域豈獨雄於詩僧間耶

初到汀州云初放到滄洲前心詎解愁舊交容不拜臨
老學梳頭禪室白雲去故山明月秋幾年猶在此北戶
水南流

元日觀郭將軍早朝云欲曙九衢人更多千條香燭照

銀河今朝始見金吾貴連馬縱橫避玉珂

九日和于使君思上京親故云清晨有高會賓從出東方楚俗風烟古汀洲草木涼山清來遠思菊意在重陽心憶華池上從容鴛鷺行皎然亦賦云霽景滿水國我公望江城碧山與黃花爛熳多秋情搖落見松柏歲寒比忠貞歡娛在鴻都是日思朝英

柳宗元韓漳州書報澈上人込因寄二絕云早歲京華聽越吟聞君江海分逾深他時若寫蘭亭會莫盡高僧

支道林又云頻把瓊書出袖中獨吟遺句立秋風桂江
日夜流千里揮淚何時到浙東又聞澈上人亡寄侍郎
楊文云東越廣僧還姓湯幾時瓊佩觸鳴璫空花一散
不知處誰採金英與侍郎

權載之送人廬山回歸沃州序云吳興長老晝公綴
六義之清英首冠方外入其室者有沃州澈上人心冥
空而無迹寄于文字故語甚夷易如不出常境而諸生
思慮終不可至其變也如風松柏韻冰玉相扣層峰千

例下有金碧聳鄙夫之目如不敢視三復則淡然天和
晦於其中故睹其容覽其詞者知其心不待境靜而靜
况會稽山水自古絕勝東晉逸民多遺身世於此夏五
月上人自鑪峰言旋復于是邦予知夫拂方袍坐輕舟
泝沿鏡中靜得佳句然後深入空寂萬慮洒然則嚮之
境物又其梯稗也鄙人方景行企尚之不暇惡敢以離
羣為嘆

澈與劉夢得友善夢得送僧仲端東遊末句呈澈云一

旦揚眉望沃州自言王謝許同遊憑將雜意三千首寄
與江南湯惠休

權載之酬以詩代書見寄云蓮花出水地無塵中有南
宗了義人已取貝多翻半字還將陽燄諭三身碧雲飛
處詩偏麗白月圓時性本真更喜開緘銷熱惱西方社
裏舊相親

載之月夜宿澈上人房云此身會逐白雲去未洗塵纓
還自傷今夜幸逢清淨境滿庭秋月對支郎

劉長卿送師云蒼蒼竹林寺杳杳鐘聲晚荷笠帶殘陽
青山獨歸遠

長卿酬師相招云石澗泉聲久不聞獨臨長路雪紛紛
如今漸欲生黃髮願脫頭冠與白雲

澈於東林寺寄陳邛二侍郎云年老心閑無外事麻衣
坐草亦容身相逢盡道休官好林下何曾見一人

張祐題澈上人舊房云寂寞空門支道林滿堂新板舊
知音秋風吹葉古廊下一半繩牀燈影深祐又寄師詩

云老僧何處寺秋夢遠江濱獨樹月中鶴孤舟雲外人
榮華長指幻衰病久觀身

呂溫在道州戲贈云僧家亦有芳春興自是禪心無滯
境君看池水湛然時何曾不受花枝影

僧靈一

新泉詩云泉源新湧出洞徹映纖雲稍落芙蓉沼初淹
苔蘚文了將空性淨素與衆流分若對青霄月冷然夢
裏聞

劉長卿和云東林一泉出復與遠公期石淺寒流處山
空夜落時夢閑聞細響慮澹向清漪動靜皆無意唯應
道者知

與亢居士青山潭飲茶云野泉烟火白雲間坐飲香茶
愛此山巖下維舟不忍去青溪流水暮潺潺

送陳先初卜居麻源云欲向麻源隱能尋謝客蹤空山
幾千里幽谷第三重嵒宇寧湏葺荷衣不待縫因君見
往事爲我謝喬松

送人得蕩子歸倡婦云垂涕憑回信爲語柳園人情知
獨難守又是一陽春

高仲武云自齊梁已來道人爲文者多矣少有入其流
一公乃能尅意精妙與士大夫更唱遞和不其偉歟泉
湧堦前地雲生戶外峰則道猷寶月曾何及此靈一大
厯貞元間僧也

酬皇甫冉西陵見寄云西陵潮信滿島嶼沒中流越客
依風水相思南渡頭寒光生極浦落日映滄洲何事揚

帆去空驚海上鷗

溪行即事云近夜山更碧入林溪轉清不知伏牛地潭洞何縱橫曲岸烟初合平湖月未生孤舟屢失道但聽

秋泉聲

重還宜豐寺云載過招隱寺重會息心期樵客問歸日

山僧寄別詩野雲陰遠甸秋水漲前陂勿謂頻來此吾

今不好奇

酬皇甫冉以下三章
姚合取為極玄集

酬皇甫冉將赴無錫雲門寄別云湖南通古寺來往意

無涯欲識雲門路千峰向若耶春山子猷宅古木謝敷
家自是長俱隱那云相去賒

靜林精舍梁武隱所有鐘磬古物云靜林溪路遠蕭帝
有遺踪水擊羅浮磬山鳴于闐鐘烟傳三世火樹老萬
株松無復烟霞色空聞昔卧龍

雨後尋天目山問元駱二公溪路云昨夜雲生天目東
春山一雨幾回風林花併逐溪流下欲上龍門通不通

無錫下三章高仲武
取為中興間氣集

自大林與韓明府歸郭中精舍云野客同舟檝相携復
一歸孤烟生暮景遠岫帶春暉不道還山是誰云向郭
非禪門有通隱喧寂共忘機

陳羽送靈一上人云十年勞遠別一笑喜相逢又上青
山去青山千萬重

嚴維哭靈一上人云一公何不住空有遠公名共說岑
山路今時不可行舊房松更老新塔草初生經論傳緇
侶文章遍墨卿禪林枝幹拆法宇棟梁傾誰復修僧史

應知傳已成

靈一宿天柱觀詩云石室初投宿仙翁幸見容花源隨水遠洞府過山逢泉湧階前地雲生戶外峰中宵自入定非是欲降龍

皇甫冉小江懷靈一上人云江上年年春草津頭日日人行借問山陰遠近猶聞薄暮鐘聲

靈一自青山詣於潛道中呈元八居士云苔水灘行淺潛州路漸深參差遠邊色迢遞野人心凍澗冰難釋秋

山日易陰不知天目下何處訪雲林

錢起寄靈一上人初歸雲門寺云寒山白雲裏法侶自招携竹逕通城下松門隔水西同期沃州去不作武陵迷彷彿心知處高峰是會稽

僧清江

夕次襄邑云何處成吾道經年遠路中客心猶向北河水自歸東古戍鳴寒角疎林振夕風輕舟唯有月那與故人同

病起云身世足堪悲空房卧病時卷簾槐雨滴掃室竹
陰移已覺生如夢那堪壽不知未能通法性詎可見支
離

宿嚴維宅簡章八元詩云佳期曾不遠甲第即南鄰惠
愛徧相及經過豈厭頻秋光林葉動夕霽月華新莫話
羈栖事平原是主人

贈淮西賈兵馬使云破敵功成百戰場天書親拜漢中
郎映門旌旆春風起對客絃歌白日長階下鬪鷄花乍

拆營南試馬柳初長由來楚蜀多同調感激逢君共異
鄉

九日菊花韻應制云可訝東籬菊能知節候芳細枝青
玉潤繁蘚碎金香逸氣浮朝露濃滋帶夜霜泛杯傳壽
酒應共樂時康

僧廣宣

李益重陽夜集蘭陵居與宣供奉聯句益云蟋蟀催寒
服茱萸滴露芳酒巡明刻燭籬菊暗尋芳宣云新月知

秋露繁星混夜霜登高今夕事九九是天長

九月十五日夜宿鄭尚書網東亭望月寄杜給事云霜
天晴夜宿東齋松竹交陰愜素懷迥出風塵心得地可
憐三五月當堦清光滿院思情見寒色臨門笑語諧宵漢
路殊從道合往來人事不相乖鄭網奉酬宣上人九月
十五日東亭望月見贈因懷紫閣舊遊云中年偶逐鴛
鷺侶弱歲多從麋鹿羣紫閣道流今不見紅樓禪客早
曾聞松齋月朗星初散苔砌霜繁夜欲分一覽綵牋佳

句滿何人更詠惠休文

中秋夜獨遊安國寺山亭院步月李益遲明至寺中求
與聯句宣云九重城接天花界三五秋分一夜風行聽
漏聲雲散後遙聞天雨月明中益云舍涼閣近通仙掖
承露盤高出上宮誰問獨愁園外理清談不與此宵同
李益與師携瘦樽歸杏園聯句云千畦抱甕園一酌瘦
樽酒唯有沃州僧時過杏溪叟李益追歡君適性獨飲我
空口儒釋事雖殊文章意多偶廣宣

王起於會昌中放第二榜宣以詩寄賀曰從辭鳳閣掌
綠綸便向青雲領貢賓再闢文章無枉路兩開金榜絕
寃人眼看龍化門前水手放鶯飛谷口春明日定歸台
席去鵠鵠原上共陶鈞起和云延英面奉入春闈亦選
功夫亦選奇在治只求金不耗用心空學秤無私龍門
變化人皆望鶯谷飛鳴自有時獨喜向公誰是證彌天
上士與新詩

劉夢得和云禮闈新榜揭長安九陌人人走馬看一日

聲名徧天下滿城桃李屬春官自吟白雪銓辭賦指示
青雲借羽翰借問至公誰印可支郎天眼定中觀元微
之和王侍郎酬宣上人詩云渥洼徒自有權奇伯樂書
名世始知競走牆前希得雋高懸日下表無私都中紙

貴流傳後海外金填姓字時珍重劉繇因首薦

進士李景述以

同判解頭及第爲君送和碧雲詩

宣會昌間有詩名與劉夢得最善宣寄在蜀與韋令公
唱和詩劉荅云碧雲佳句久傳芳曾向都城住草堂振

錫長過長者宅披文猶帶令公香一時風景添詩思八
部人天入道場若許相期同結舍吾家本自近柴桑

退之有廣宣上人頻見過詩云三百六旬長擾擾不衝
風雨即塵埃久慙朝士無裨補空愧高僧數往來學道
同年何所得吟詩竟日未能回天寒古寺遊人少紅葉
窓前有幾堆

樂天別宣上人云上人處世界清淨何所似似彼白蓮
花在水不着水性真悟泡幻行潔離塵滓修道未幾時

身心俱到此嗟予牽世網不得長休止離念與碧雲秋
來朝夕起

宣以應制詩示樂天時詔許上人居安國寺紅樓以詩
供奉樂天有詩云道林談論惠休詩一到人天便作師
香積筵承紫泥詔昭陽歌唱碧雲詞紅樓許住請平聲銀
鑰翠輦陪行蹋玉墀惆悵甘泉曾侍從與君前後不同
時

李益贈宣大師云一國沙彌獨解詩人人道勝惠休師

先皇詔下徵還日今上龍飛入內時看月憶來松寺宿
尋花思作杏溪期因論佛地求心地祇說常吟是住持

唐詩紀事卷七十二

欽定四庫全書

唐詩紀事卷七十三

宋 計敏夫 撰

僧法振

僧常雅

僧隱邛

僧法照

僧冷然

金地藏

僧皎然

僧護國

僧舍臘

僧法振

月夜泛舟云西塞長雲盡南湖片月斜漾舟人不見卧

入武陵花

趙使君生子晦日詩云毛骨貴天生肌膚片玉明見人
空解笑弄物不知名國器嗟猶小風神望益清抱來芳
樹下時聽鳳凰聲

送人遊閩越云不須行借問爲爾話閩中海島春寒雨
江帆來去風道遊玄度宅身寄朗陵公此別何傷遠如
今關塞通

疾愈寄友人云哀樂暗成疾卧中芳月移西山有清士
孤嘯不可追擣藥曙林淨汲泉陰澗遲微踪與麋鹿遠

謝求羊知

送人遊閩以下二章
姚合取用極元集

題天長阮少府湖上客歸云孤棹移官舍新農寄楚田
晴林渡海日春草長湖烟卧對閑鷗戲談經稚子賢佳
期更何許應向笑臺前

陳九溪中草堂云溪草落濺濺魚飛入稻田早寒臨洞
月輕素卷簾烟頽憤題新句蓑衣象古賢曙花閑秀色
三十六峰前

送韓侍御自使幕廵海北云微雨空山洗夜兵繡衣朝

拂海雲清幕中揮策心應苦馬上題詩卷已成離筵莫惜花園醉古道猶看夢草生因說元戎能破虜高歌一曲龍闕情

李益與振同賦應門綠苔益詩云宮闕何年月應門何歲苔清光一以照白露共徘徊珠履久行絕玉房重未開妾心正如此昭陽歌唱來

李益送賈弇秘校東歸寄振上人云北風南鴈數聲悲況指前林是別時秋草不堪頻送遠白雲何處更相期

山隨匹馬行看暮路入寒城獨去遲爲向東州故人道
江淹已擬惠休詩

僧常雅

題五相廟蒼蒼古廟映林巒漠漠烟霞覆古壇精魄不
知何處在威風猶入浙江寒

僧隱邱

石橋琪樹云山上天將近人間路漸遙誰當雲裏見知
欲渡仙橋

僧法照

送禪師歸新羅云萬里歸鄉路隨緣不算程
登山百衲敝過海一杯輕夜宿依雲色晨齋就水聲
何年持貝葉却到漢家城

寄錢郎中云閉門深樹裏閑足爲經過駟馬不爲貴
一僧誰奈何稻苗家自有香飯乞時多寄語嬪娟客將心

向薜蘿

僧冷然

宿九華化成寺庄詩云佛寺孤庄千嶂間我來詩境強
相關巖邊樹動猿下磽雲裏錫鳴僧上山松月影寒生
碧落石泉聲亂噴潺湲明朝更躡層霄去誓共烟霞到

老闍

冷然唐末僧也

金地藏

新羅國王子也至德初落髮航海隱於池之九華山送
童子下山詩云空門寂寞汝思家禮別雲房下九華愛

向竹欄騎竹馬懶於金地聚金沙添瓶澗底休招月烹
茗甌中罷弄花好去不須頻下淚老僧相伴有烟霞

僧皎然

姓謝字清晝吳興人靈運十世孫居杼山顏真卿爲刺
史集文士撰韻海皎然預其論著貞元中集賢院取其集
藏之于頤爲序

嘗於舟中抒思作古體十數篇求合韋蘇州韋大不喜
明日獻其舊製乃極稱賞云向不但以所工見投而猥

希老夫之意人各有所得非卒得至畫大服其鑒裁之
精

訪陸羽云太湖東西路吳王古山前所思不可見歸鴈
字翩翩何山賞春茗何處弄春泉莫是滄浪子悠悠一

釣船

舟行懷閻士和云二月湖南春草遍橫山渡口花如霰
相思一日在孤舟空見歸雲兩三片

山雪云夕陽在西峰疊翠縈殘雪狂風卷絮回驚猿攀

玉折何意山中人誤報山花發

詠史云田氏門下客馮公衆中賤一朝市義還百代名
獨擅始知下客不可輕能使主人功業成借問高車與
珠履何如卑賤一書生

又云獨負高世姿冥冥寄淳俗卞子去不歸何人識荆
玉鬻春意不淺污跡身豈辱鸞鑛樂迷遭蚪蟠甘窟束
五噫謫且正可以見心曲

思歸示說公云桐江秋信早憶在故山時靜夜風鳴簷

無人竹掃墀
獨來觸淨水
鳥下啄寒梨
何物闔吾事
歸心自有期

題審道士新亭云
何處好攀躋
新亭俯舊溪
坐中千里
近簷下四山
低小浦依林
曲回塘
遠郭西桃花
春滿地
滯路莫相迷

懷舊云
一坐西林寺
從來未下山
不因尋長者
無事到人間
宿雨愁爲客
看花笑未還
空懷舊山月
童子念經閑
陪盧中丞閑遊山寺
云野寺出人境
捨舟登遠峰
林

間明見月萬壑靜聞鐘擁燭明山翠交麾動水容如何
股肱守塵外得相逢

同裴錄事樓上望月云退食高樓上湖山向晚晴桐花
落萬井月影出重城水竹涼風起簾幙暑氣清蕭蕭獨
無事因見蒞人情

仙女臺云寂寂舊桑田何時女得仙應無鷄犬在空有
子孫傳古木花猶發荒臺路未遷暮來雲一片疑是欲

歸年

陪盧使君登樓送方巨之還京云萬里汀洲上東樓欲
別難春風潮水漫正月柳條寒旅逸逢魚浦清高愛鳥
冠雲山寧不起今日向長安

尋陸鴻漸不遇云移家唯帶郭野逕入桑麻近種籬邊
菊秋來未着花扣門無犬吠欲去問西家報道山中去
歸來日每斜

酬崔侍郎見贈云買得東山後逢君小隱時五湖遊不
厭柏署迹如遺儒服何妨道禪心不廢詩一從居士說

長破小乘疑

若溪春興云春生若溪水雨後漫流通芳草行無盡清源去不窮野烟迷急浦斜日起微風數處承流望依稀似剗中

湖南草堂讀書招李少府云削去僧家事南池便隱居爲憐松子壽還卜道家書藥院常無客茶樽獨對餘有時招逸吏來飯野中蔬

宿吳匡山破寺云雙峰百戰後真界滿塵埃蔓草沿空

壁悲風起故臺野花寒更發山月暝還來何事池中水
東流獨不回

宿法華寺云心與空林共杳冥孤燈寒竹自熒熒不知
何處小乘客一夜風來聞誦經

答李季蘭云天女來相試將花欲染衣禪心竟不起還
捧舊花歸

酬鄭判官湖上見贈云歲歲湖南隱已成如何星使忽
知名沙鷗慣識無心客今日逢君不解驚

贈韓武康云山僧唯不飲沽酒飲陶潛此興雖無別多爲俗士嫌

韋蘇州寄皎然云吳興老釋子野雪蓋精廬詩名徒自振道心常晏如想茲栖禪夜見月東峰初鳴磬警巖壑焚香滿空虛夙慕端成舊未識豈爲疎願以碧雲思方君怨別餘茂苑文華地流水古僧居何當一遊詠倚閣吟躊躇

皎然詩式著偷語詩例云如陳后主詩日月光天德取

傅長虞日月光太清上三字語同下二字義同偷意詩
例云如沈佺期詩小池殘暑退高樹早涼歸取柳渾太
液滄波起長楊高樹秋偷勢詩例云如王昌齡詩手携
雙鯉魚目送千里鴈悟彼飛有適嗟此罹憂患取嵇康
目送歸鴻手揮五絃俯仰自得遊心太玄詩式云詩有
跌宕格二品一曰越俗其道如黃鶴臨風貌逸神王杳
不可羈郭景純遊仙詩左挹浮邱袖右拍洪崖肩鮑明
遠詩舉頭四顧望但見松柏繁荆棘鬱叢叢中有一鳥

名杜鵑言是古時蜀帝魂聲音哀苦鳴不息羽毛憔悴似人髡飛走樹間啄虫蟻豈知往日天子尊念茲變化非常理中間惻隱不能言二曰駭俗其道如楚有接輿魯有原壤外示驚俗之貌內歲達人之度郭景純遊仙詩嫦娥楊妙音洪峴領其顧王梵志道情詩我昔未生時冥冥無所知天公彊生我生我復何爲無衣使我寒無食使我飢還你天公我還我未生時賀知章放達詩云落花真好夢一醉一回顛盧照鄰漫作云城狐尾獨

歛山鬼面參譚澁沒格一品曰淡俗此道如夏姬當壚似蕩而貞采吳楚之風雖俗而正古歌曰華陰山頭百尺井下有流泉徹骨冷可憐女子來照影不照其餘照斜領調笑格一品曰戲俗漢書云匡鼎來解人頤蓋說詩也此一品非雅作不足以爲談笑之資矣李白狂詠女媧弄黃土搏作愚下人散在六合間濛濛若塵埃

微雨云片雨拂簷楹煩襟四座清霏微過麥龍蕭瑟傍莎城靜愛和梅落幽閒入竹聲朝觀趣無限高詠寄閑

情

題廢寺云武陵罹亂後真界積塵埃殘月照秋水悲風
起古臺居人今已盡栖鴿暝還來不到無生理應堪賦
七哀

賦得啼猿送客三峽云萬里巴江外三聲月峽深何年
有此路幾客共霑襟斷壁分重影流泉入苦吟淒淒別
離後聞此更傷心

徵雨以下三章姚
合取為極玄集

護國

贈張駙馬班竹柱杖詩云此君與我在雲溪勁節竒文
勝杖藜為有歲寒堪贈遠玉堦行處願提携

護國江南人攻詞翰題醴陵玉仙觀歌云王喬一去空
仙觀白雲至今凝不散星垣松殿幾千秋往往笙歌下
天半瀑布西行過石橋黃精採根還採苗路逢一人擎
藥椀松花夜雨風吹滿又言家住在東坡白犬相隨邀
我過南山石上有棋局曾使樵夫爛斧柯

張謂哭護國上人云昔喜三身淨今悲萬劫長不應歸

北斗多是向西方舍利衆生得袈裟弟子將鼠行殘藥
椀虫網舊繩床別起千花塔空留一草堂支公何處在
神理竟茫茫

僧含曦

盧仝訪含曦上人云三入寺曦未來輒艤無繩井百尺
渴心歸去生塵埃曦酬云長壽寺石壁院盧公一首詩
渴飲即不渴飢食即不飢鯨吞海水盡露出珊瑚枝海
神知貴不知價留向人間光夜

唐詩紀事卷七十三

欽定四庫全書

唐詩紀事卷七十四

宋 計敏夫 撰

僧文秀

僧尚能

僧棲白

僧無可

僧神頴

僧懷濬

僧應物

僧可朋

僧雲表

僧文秀

端午詩云節分端午自誰言萬古傳聞爲屈原堪笑楚江空浩浩不能洗得直臣冤

秀唐末詩僧也鄭谷喜秀上人相訪詩有他夜松堂宿論詩更入微之句又次韻秀上人長安寺居言懷云舊齋松老別多年香社人稀喪亂間出寺只知趨內殿閉門長似在深山又重訪秀上人云展畫長懷吳寺殿宜茶偏賞雪溪泉又寄題詩僧秀公云靈一心傳清塞心可公吟後楚公吟近來雅道相親少唯仰吾師所得深好句未停無暇日舊山歸老有東林吟曹孤宦甘寥落多謝携筇數訪尋秀南僧也而居長安以文章應制故

谷送遊五臺詩云內殿評詩切身回心未回

僧尚能

中秋旅懷云所畜惟騷雅薰之得固窮望鄉連北斗聽
雨帶西風稼穡村坊遠烟波路逕通冥搜清絕句恰似
有神功

僧棲白

中秋夜月云尋常三五夕不是不嬪娟及到中秋半還
勝別夜圓清光凝有露皓色爽無煙自古人皆玩年來

更一年

哭劉得仁云爲愛詩名剛到此風魂雪魄去難招直教
桂子落墳上生得一枝冤始銷

送造微上人遊五臺及禮本師云寒空金錫響欲過渭
陽津極目多來鴈孤城少故人與師雖別久於法本相
親又對清涼月中宵語宿因

送僧歸舊山云談空與破邪獻壽復榮家白日得何偈
青天落幾花傳燈皆有分化俗獨無涯却入中峰寺還

知有聚沙

曹松薦福贈白上人云才子紫檀衣明君寵顧時講昇
高座懶書答重臣遲瓶勢傾圓頂刀聲落碎髡還聞穿
內禁隨駕進新詩

李洞贈白上人云險倚石屏風秋濤夢越中前朝吟侶
散故國講流終北地聞巴狹南山見磧鴻樓高驚雨潤
木落覺城空鬼滿期姚監蟬稀別楚公淨瓶光照客柱
杖朽生蟲平地塔千尺半空燈一籠祝堯談幾句旋鴈

海潮東

洞又哭白上人云聞說孤窓卧化時首摩羅雨滴空池
吟詩堂裏秋開影禮佛燈前夜照碑賀雪已成金殿夢
看濤終負石橋期逢山對月還惆悵爭得無情似祖師

僧無可

中秋翫月云蟾宜天地靜三五對堦明照耀超諸夜光
芒掩衆星影寒池更澈雲冷樹梢青枉值中秋夜長乖

宿洞庭

金州夏晚陪姚合員外遊金州南池云柳暗青波漲衝
萍復嫩苔張筵白鳥下掃岸使君來洲島秋應沒荷花
晚盡開高城吹角絕驕馭尚徘徊

冬日寄僧友云歛履入寒竹安禪過漏聲高杉殘葉落
深井凍痕生罷磬風枝動懸燈雪屋明何當招我友乘
月上方行

白閣未歸日青門又值春半天傾瀑溜數郡見廬峰句
右張爲取作主客圖

秋夜宿西林寄賈島云暗蟲喧暮色默思坐西林聽雨
寒更盡開門落葉深昔因京邑病併起洞庭心亦是吾
兄弟遲回共至今

秋日寄厲元云楊柳起秋色故人猶未還別離俱自老
少壯豈能閑夜雨吟殘燭秋城憶遠山何當同一見語
默此林間

廬山寺云千峰盤磴盡林寺昔年名步步入山影房房
聞水聲多年人跡絕殘月石陰清便可求居止安閑過

此生

題青龍寺僧房云從誰傳法印不離上方傳夕磬城霜
下寒房竹月圓煙殘衰木畔客住積雲邊未隱滄洲去
時來於此禪

新年作云然燈朝復夕漸作長年身紫閣未歸日青門
又值春掩關寒過盡出定草生新自有林中趣誰驚歲
月頻

贈圭峰禪師云絕壑禪床底泉分落石層露澆高頂草

雪隱下方燈朝滿傾心客溪連學道僧半旬持一食此事有誰能

金州別姚合云日日西亭上春留到夏殘言之離別易勉以道途難山出一千里溪行三百灘松間樓月裏秋入五陵寒

姚合送無可住越州云清晨相訪門前立麻履方袍一少年懶讀經文求作佛願攻詩句竟成仙芳春山影花連寺觸夜湖聲月滿船今日送行偏惜別共師文字有

因緣

李洞贈可上人
云寺門和鶴倚香杉
月吐秋光到思嚙
將法傳來穿決漭
把詩吟去失嵌巖
模糊疏卷烟嵐滴
狼藉衣裳瀑布緘
不斷清風牙底嚼
無因內殿得名銜

僧神頴

和王季文題九華山
云衆岳雄分野
九華鎮南朝彩筆
凝空遠崔嵬
寄青霄龍潭古仙府
靈藥今不凋瑩爲滄
海鏡烟霞作荒標
造化心數竒性狀
精氣饒玉樹鬱玲

瓏天籟韻蕭寥寂寂尋乳竇兢兢行石橋通泉漱雲母
藉草紫香茗我住幽且深君賞畢復朝稀逢發清唱片
片霜凌飈

宿嚴陵釣臺云寒谷荒臺七里洲賢人求逐水東流獨
狹叫斷青天月千古冥冥潭樹秋

僧懷濬

衲歸郡僧懷濬不知何所人乾寧初知來藏往皆有神
驗刺史于公以其惑衆繫而詰之乃以詩代通狀云家

在閩山西復西其中歲歲有鶯啼如今不在鶯啼處鶯
在舊時啼處啼又詰之復有詩云家在閩山東復東其
中歲歲有花紅而今不在花紅處花在舊時紅處紅守
異而釋之詳其詩意似在海中得非杯渡之流乎出北
夢瑣言

僧應物

龍潭云石激懸流雪滿灣五龍潛處野雲閑暫收雷電
九峰下且飲溪潭一水間浪引浮槎依北岸波分曉日

浸東山回瞻四面如看畫湏信遊人不欲還

題化城寺云平高選處創蓮宮一水縈流處處通盡閣
畫開遲日畔禪房夜掩碧雲中平川不見龍行雨幽谷
遙聞虎嘯風偶與遊人論法要真元浩浩理無窮

應物大中時江南詩僧也與羅鄴唱酬作九華山記

僧可明

可明丹稜人少與延讓為風雅之友有詩千餘篇號玉
壘集會洞庭詩云水涵天影闊山拔地形高贈友人

曰來多不似客坐久却垂簾歐陽烟以此比孟郊賈島
言其好飲酒貧無以償酒債以詩贖之可勿自號醉髡
贈方干詩云月裏豈無攀桂分湖中空賞釣魚休杜甫
舊居云傷心盡日有啼鳥獨步殘春空落花寄齊已云
唯陪北楚三千客多話東郊十八賢劉公詩話云有詩
僧讀洪州滕王閣詩謂守者詩總不佳何不除却守云
僧能佳乎即吟曰洪州太白方積翠滿穹蒼萬古遮新
月半天無夕陽守異之然南方浮屠能詩者多矣予嘗

見可明詩云虹收千丈雨潮弄半江天又云詩因試客
分題僻基爲饒人下着低不減唐人

出詩話

孟昶廣政十九年賜詩僧可明錢十萬帛五十尺

孟蜀歐陽迥與可明爲友是歲酷暴中歐陽命同僚納
涼於淨衆寺依林亭列樽俎衆方懽適寺之外皆耕者
曝背烈日種耘田擊腰鼓以適倦可明遂作耘田鼓詩
以贊歐陽衆賓悶已遽命撤飲詩曰農舍田頭鼓王孫
筵上鼓擊鼓兮皆爲鼓一何樂兮一何苦上有烈日下

有焦土願我天翁降之以雨令桑麻熟倉箱富不飢不
寒上下一般言雖淺近而極於理君子謂可明諫而歐
陽善聽焉

明賦洞庭云周極八百里凝眸望則勞水涵天影闊山
拔地形高賈客停非久漁翁轉幾遭颯然風起處又是
皷波濤

僧雲表

寒食詩云寒食悲看郭外春野田無處不傷神平原壘

壘傷新塚半是去年來哭人

唐詩紀事卷七十四